

Exitoso celebracion di 85 aña di existencia di Camara di Comercio



ORANJESTAD - Diahuebs, 22 di october ultimo a tuma luga den e ballroom dib Hyatt Regency Aruba e evento anual di Camara di Comercio (KvK), cu e biaha aki a ser combina cu e celebracion di su 85 aña di existencia. The Aruba Chamber 85th Celebration Event 'From Red Tape to Red Carpet' a conta cu presencia di aproximadamente 260 persona.

Como maestro di ceremonia a fungi Sra. Michele Brooks. Presidente di KvK, Sra. Dapnhe Agius Cesareo Lejuez, a duna un introduccion reflehando e 85 aña di existencia di KvK. Su discurso a toca tambe cierto punto crucial relata na e tema di e evento "From Red Tape to

Red Carpet". A señala e obstaculonan cu empresario y inversionistanan ta encontra y e cambionan cu por introduci pa simplifica entre otro e proceduranan na momento di haci negoshi. Esaki ta basa ariba un 'Business Publication' produci pa KvK cu durante e evento a ser lansa.

Siguientemente Presidente di KvK a haci entrega di e publicacion na S.E. Gobernador, Sr. Fredis Refunjol. Na final di e anochi e participantenan a ricibi un muestra di aprecio cu a inclui copia di e publicacion aki den forma digital riba un USB stick.

Despues di e speech di Sr. Pierre Rafini di RBC Royal Bank y e presentacion di Sr. Rotmar Coenraad di AFAS Software Aruba, e orador invita, Sr. Xavier Debrun, a duna su presentacion cual a hiba e tema un poco mas den profundidad y a presenta al-

gun testimonio internacional. Sr. Debrun a duna sugerecianan crucial pa crea un economia stabiel y duradero.


Segun su experiencia como hefe interino di e departamento di supervision y asunto fiscal di IMF, Sr. Debrun



a señala cu e budget di gobierno mester tin estabilidad economico, caminda cu cobranza di e impuesto di diferente parti di e GDP ta sumamente importante y cu no tene cuenta cu inversionnan di infraestructura basico por

descurasha inversion priva. Despues di e presentacion di Sr. Debrun varios pregunta a wordo haci y Sr. Debrun a duna contesta amplio na cada pregunta. E prome parti di e anochi a wordo clausura cu un video di e historia di Camara di Comercio, sigui pa un show di baile di carnaval y un toast di Directiva di KvK hunto cu e invitadonan. Despues tur presente a haya oportunidad amplio pa network y intercambia di idea y expresa nan punto di bista ariba e topiconan cu a ser presenta. Esaki a tuma luga den un ambiente

ameno den patio y foyer di Hyatt Regency Aruba y a wordo acompaña pa hors' d'oeuvres y premium drinks. E celebracion di KvK su 85 aña di existencia a culmina cu e presentacion di e banda musical 'Buleria' cu a crea e



ambiente festivo cu un y tur a gosa di dje.

Camara di Comercio kier a gradici e patrocinadonan di e evento: RBC Royal Bank, AFAS Software Aruba y Pizza Hut pa haci e evento aki posibel. Por ultimo, palabranan di gratitud ta bay tambe na tur persona cu a asisti na e 'Aruba Chamber 85th Celebration Event' y cu a contribui pa haci e evento aki espectacular y exitoso. Camara di Comercio kier duna elogio na tur comerciante cu a pesar di tur obstaculo ta sigui haci esfuerzonan grandi pa nan negoshi por progresa y cu na mes momento ta aporta na economia di nos pais. KvK di su banda ta dispuesto pa sigui brinda e apoyo y sosten necesario pa contribui na esaki. □